



JUDICIAL SYSTEM MONITORING PROGRAMME
PROGRAMA MONITORIZAUN BA SISTEMA

Komunikadu Imprensa 29 Setembru 2023 Munisípiu Bobonaro

JSMP realiza treinamentu ba treinadór ka “*Training of Trainers (TOT)*” ba lideransa suku no comunidade sira iha Suku Batugade

Iha 26 to’o 27 Setembru 2023, JSMP hala’o treinamentu ba treinadór ka “*Training of Trainers*” (ToT) kona-ba Lideransa Transformativa. Treinamentu ne’e hala’o iha Suku Batugade, Postu Administrativu Balibo, Munisípiu Bobonaro.

Objetivu husi treinamentu ne’e mak atu hasa’e koñesimentu líder komunitária sira-nian kona-ba oinsa mak bele sai tipu lideransa ida ne’ebé transformativu hodi bele inspira no halo mudansa pozitivu iha comunidade no sociedade. Alende ne’e, hasa’e mós sira-nia koñesimentu kona-ba oinsa mak bele transfere tutan ka sai fasilitadór ba iha membru comunidade sira informasaun kona-ba tráfico umanu, igualdade jéneru no violénsia bazeia ba jéneru.

Matéria ne’ebé apresenta iha treinamentu ne’e kona-ba lideransa transformativu, treinamentu ne’e inklui mós ho materia sira kona-ba igualdade jéneru, violénsia bazeia ba jéneru, tráfico umanu no rede referrál sira.

“JSMP agradese ba estrutura suku tanba fó tan oportunidade ba JSMP hodi bele continua treinamentu ba segundu faze ne’ebé sei foku ba treinamentu ba treinadór sira ka training of trainers (ToT) hodi prepara sira sai lideransa transformativu iha sira nia sociedade ba asuntu igualdade jéneru, prevensaun ho kombate violénsia bazeia ba jéneru no tráfico umanu. Alende ne’e espera katak iha sesaun sira ne’e, partisipante sira bele aprende buat barak kona-ba oinsá atu sai lideransa ne’ebé mak di’ak no agradese mós ba estrutura suku tanba bele organiza partisipante ne’ebé maiória partisipante mai husi fetu inklui iha representante husi maluk LGBTIQ+” dehan Sra. Ana Paula Marçal, Diretora Ezekutiva JSMP.

Representante Xefe Suku Batugade Sr. Moises Wilhemus Lelo agradece ba iha Diretora no mós ekipa ba treinamentu segundu ne’e no husu ba partisipante sira atu partisipa ho másimu no rona ho di’ak informasaun ne’ebé fó husi fasilitadór/a sira hodi ikus bele tulun sira nia família no comunidade prevene an husi aktu sira liga ho violénsia bazeia ba jéneru liuliu kona-ba tráfico umanu labele akontese tan iha Suku Batugade tanba sira hela kedan iha area fronteira ho Indonézia.

Durante treinamentu, partisipante sira husu pergunta prinsipál balun mak hanesan kestaun kona-ba trafikante sira consege lori vitima sira ne’e sai tiha husi Timor-Leste entaun bele halo keixa ba kazu ne’e ka la’e? JSMP esplika katak krime sira iha tipu tráfico umanu konsidera hanesan krime públiku, nune’e ema se de’it bainhira hatene bele halo denúnsia tanba nia preskrisaun ba prosedimentu kriminál tuir provizaun

Artigu 113 Kódigu Penál determina tuir ninia másimu husi moldura penál ba kada krime, entaun comunidade sira la prezisa preokupa ho nia durasaun keixa maibé importante tenke halo denúnsia no polísia ho Ministériu Públiku mak sei haree kazu nia durasaun tempu ba keixa.

Parte seluk, kona-ba autór sira ne'ebé konsege lori halai ona vítima ba nasaun seluk, ida ne'e importante comunidade sira apresenta vítima nia identidade ho loloos inklui suspeitu sira se karik sira hatene no Ministériu Públiku ho ninia kompeténsia tomak ne'ebé iha sei utiliza meus oioin hodi buka tuir vítima sira nia paradeiru inklui oinsa para bele prosesu suspeitu sira.

Iha apresentasaun matéria kona-ba lideransa transformativu, partisipante sira antusiasmu tebes hodi rona informasaun ne'ebé fasilidadora fó no iha sesaun ne'e xefe juventude fó ninia observaun jerál katak matéria ne'e foun tebes. Nia dehan katak esplikaun ne'e hanesan mós reflesaun ida oinsa mak atu sai líder ida ne'ebé mak di'ak. Ida ne'e, tanba durante ne'e hanesan xefe juventude, organiza ona atividade barak iha suku laran no envolve an iha grupu oioin no tuir ninia hanoin seidauk hala'o knaar ne'e ho di'ak. Depoisde rona esplikaun kona-ba lideransa transformativu, foin hatene katak atu sai líder ne'ebé mak di'ak tenke fó oportunidade ba membru sira atu dezenvolve sira ninia an, rona barak no fó mós tempu ba sira espresa saida mak sira sente. Buat ne'ebé mak interesante mós iha sesaun ne'e mak "labele husik ema ida iha kotuk" signifika katak presija envolve ema hotu iha atividade hotu, tantu mane, feto, comunidade LGTBI no ema ho defisiénsia, liuliu maluk LGBTIQ+.

Iha sesaun ikus husi treinamentu ne'e, JSMP mós fahe panfleitu kona-ba definisaun tráfiku umanu, número kontaktu husi rede ferrál no oinsa atu hato'o keixa ba kazu sira tráfiku umanu no violénsia bazeia ba jéneru.

Partisipante sira iha treinamentu ne'e mai husi representante comunidade no estrutura suku ne'ebé kompostu husi xefe aldeia, xefe joventude no membru LGTBI. Totál partisipante hamutuk ema na'in 23 ne'ebé kompostu husi feto nain 13 no mane na'in 10.

Atu hetan informasaun liutan favór kontaktu:

Ana Paula Marçal
Diretora Ezekutiva JSMP
Telefone: 3323883/77040735
Diresaun e-mail: ana@jsmp.tl
info@jsmp.tl
Website: <http://jsmp.tl>